

大方廣佛華嚴經論卷第三十八 多八

唐方山長者李通立造

十通品第二十八 經在四十卷首

將釋此品兩門分別○一釋品來意○二隨文釋義

○一釋品來意者為明前有十定品此明以定起用即有十種神通

○二隨文釋義者即明定有十種神通其十通者具如下列如文具明

○第一段有十三行半經明都舉十種通之

數并舉初他心智通之大用閻魔王者此曰

遮止謂遮止誠最罪人能離苦故 爾時普賢菩薩起至

善知他心智神通止

○第二段有十一行經明天眼智通之大用

佛子起至天眼智神通止

○第三一段有二十四行半經明宿命隨念

智通大用 佛子起至宿住智神通止

○第四一段有十八行經明知盡未來除劫

智通大用 佛子起至未來除劫智神通止

○第五一段有十三行半經明天耳圓滿通

之大用 佛子起至天耳智神通止

○第六一段有二十行半經明住無體性神

通起十三種神通大用 佛子起至佛刹智神通止

○第七一段有十三行經明善分別一切眾

生語言智通大用 佛子起至言辭智神通止

○第八一段有四十一行經明出生無量阿

僧祇色身莊嚴智通大用 佛子起至色身智神通止

○第九一段有二十二行半經明以一切法

智通大用此明於根本無作智起一切差別

智故 佛子起至法智神通止

○第十段三五行半經明以一切法滅盡
 三昧智通大用此一段明於法性寂滅理中
 常起大智大悲大用利生性圓滿故佛子起至無礙
智神通止
 此已上十通皆以不思議無作無礙無限大

自在智起無限寂用入因陀羅網境界重重
 自在法門皆不可作三乘有限量見故如阿
 那律我以天眼見三千大千世界如觀掌中
 菴摩勒果等如權教菩薩見自他佛國往來
 彼此皆有量故此約法身無限無表裏中間
 智身亦爾總無限故處帝網重重大用故總
 約第一義天一切智天非如世間上界諸天
 眼耳通及三乘聲聞緣覺淨土菩薩通故以
 住無體性神通身恒不離本處而十方一切
 諸佛國土一切衆生國土皆悉現自在身及

多

二

以毛孔而眼耳鼻舌身心無不共同一體一
 性如因陀羅網衆像互容無往來自他之性
 此十通體如是徧周如是通徹名爲神通以
 智徧通與物同性而知物故名爲神通非是
 往來自他見故如此十定十通十忍等是十

地位終入於生死利衆生之方便亦是十住
 十行十迴向十地十一地五位通修餘義經
 文自具

十忍品第二十九

將釋此品約分三門○一釋品名目○二釋
多
 品來意○三隨文釋義

○一釋品名目者明此品通初發心之始自
 位昇進行之門亦通佛果後利衆生成行之
 方便以隨行之忍依行立名若以權教菩薩
 地前爲伏忍地上見道方入順無生忍若以

三

一乘通十住初心得憶念諸佛智慧光明門
名生佛智慧家名得音聲忍亦名順無生忍
但爲隨行名異故且約十住初生佛智慧家
約名順佛正智慧無生忍以十行中名以佛
智慧隨行無生忍以十迴向中以約理智之
中以無限大願起大慈悲門和融理智大慈
悲使令均調名和融大願大悲大智寂用無
生忍此是地前隨行順無生忍從初地至三
地總取地前三位總作一法修行名長養智
悲使令慣習成滿以初地依地前十住十行
十迴向大願圓滿發心起常處生死守護衆
生之志是故亦名順忍直至八地名得無生
忍善財童子初地善知識名婆珊演底此名
主當春生苗稼亦名依止無畏爲明表主當
衆生初發心之菩提苗稼亦名主當衆生與

作依止使令無畏此初地菩薩以前願力處
衆生界行故二地明修上上十善戒治欲界
感習使令無著故三地修上界八禪及以九
定令於禪界不著此名順其理智利俗長養
大悲順無生忍四地方明三界不污又明生
在佛家五地以禪定門發善巧智慧修世間
技藝六地修世間出世間智慧已終滅定三
空現前名寂滅忍七地常處生死行圓八地
現行菩薩行功用已終得無生忍九地以法
師位明說法得自在用十地佛用一分方終
十一地普賢行滿已去純是妙覺如來不離
菩薩方便以用濟生此十種忍若以十地昇
進論之一地得一忍十定十通亦然約以堪
忍之位至普賢行內以立品之名目又隨位
進修之位調治之功隨行立名名之十忍品

○二釋品來意者前已有十通此乃約通有忍若無神智通達但成伏忍法忍不生以此品須來此乃十地已前以忍成通十一地內以通成忍亦是十定十通十忍是一德之功用故

○三隨文釋義者已下有十段文明十種忍
△第十段已下有一段頌是重頌前十忍法故如第一音聲忍總配五位中初位十住初十行初十迴向初十地初十一地初如第二順忍者十住第二住十行第二行十迴向第二迴向十地第二地十一地第二位如是一一次第五位同配但以昇進功用慣習生熟不同故如是無生法忍如幻忍如談忍如夢忍如響忍如影忍如化忍如空忍皆如上一隨五位同配同修又一位具十忍故餘義

如文自具已上十一地行滿

阿僧祇品第三十

將釋此品約立四門○一釋品來意○二釋能問之主○三釋說法之主○四隨文釋義
○一釋品來意者明前十定十通十忍三品

明該括因果初終始末不遷剎那之際已成神通法忍具足明一切諸佛所施因果教行方便果行相資始終不絕不離剎那之時如仁王經一念中具九十剎那一剎那經九百生滅如是三世佛果及普賢方便行總時不遷故但以剎那爲量不立生滅之名設論生滅但於剎那內安立更無長短自此已下至如來出現品明佛果之中三業廣大自在行門且如阿僧祇一品明如來心業廣大自在二如來壽量品明如來命廣大自在三菩薩

住處品明如來行攝生廣大常住自在四佛
不思議法品明歎佛三業神德廣大自在五
如來十身相海品明佛身業報得莊嚴廣大
自在六如來隨好光明功德品明佛三業所
順法身所感之功德廣大自在依纓絡經配
第三禪說佛華三昧有百萬億頌即是此普
賢行品是其畧也當第七會合名佛華三昧
品七普賢行品明佛三業果行徧周廣大自
在八如來出現品明佛覺行徧周常於一切
世間無時不出現廣大自在之八品經總
歎佛果行智德三業功用及莊嚴報相廣大
自在故以次此品須來

○二釋能問法主者菩薩名心王此明得心
成忍之後心業自在名之爲王

○三釋能說法之主者此品何故如來自說

明此數法廣大下位智所不及唯佛能究竟
故此是佛果二愚非至差別智滿方了即此
阿僧祇品隨好光明功德品二品法是如來
自說自餘五位各各隨位菩薩自說十信菩
薩說十信法即文殊覺首等是十住菩薩說
十住法即法慧財慧等是如是准此例知以
此此品非至差別智果滿佛位方明還是如
來自說故所問之主還是如來心智自在名
之爲王表心自在故方堪能問總是佛自在
之心故設教法則令學者傲之故說行以普
賢主之以行成忍即以王主之又此數法智
滿佛果方終以智徧故任運而知非是加行
作意而知以此佛自說故

○四隨文釋義者一百洛又爲一俱胝者一
洛又此云一億一俱胝此云一兆又案此方

黃帝算法總有二十三數謂一二三四五六七八九十百千萬億兆京秭垓壤溝澗正載從壞已去有三等數法其下者十十變之中者萬萬變之上者億億變之今此阿僧祇品用上等數法故云百千百千為一俱胝俱胝俱胝是當此壞也三六那由他當溝也七鞞婆羅當此澗也作正也來載也自是已去此方數名盡也彌伽及毗伽皆上聲呼矜居陵反羯摩娑婆上聲呼反羅即何反毗伽擔多甘反暨於美反擺陀阿麼莫我反救蒲沒反辟蒲計反宰蘇沒反暎普計反謎莫計反茶宅加反此已上數義廣大雖復無量難量意明如來智慧普賢願行三業廣大世數不能及故如下文頌中具明此已上依大數有百二十大數至不可說不可說轉以為一終頌云不可言說不可說充滿一切不可說不

可言說諸劫中說不可說不可盡不可言說諸佛刹皆悉碎抹為微塵一塵中刹不可說如一切皆如是此不可說諸佛刹一念碎塵不可說念念所碎悉皆然盡不可說劫恒爾此塵為刹不可說此刹為塵說更難以不可說算數法不可說劫如是數以此諸塵數諸劫一塵十方不可說爾劫稱讚一普賢無能盡其功德量意明如來普賢願行功德過稱量數量所不及故如是此品說佛位內普賢行願虛空不可量刹塵不可比無限重重無限重重廣如經自具如是多劫是一刹那際多如是如來普賢行是一刹那中無盡故准前第二會所問合有十頂品來文未至

壽量品第三十一

將釋此品約作三門。一釋品來意。二釋

說教之主○三隨文釋義

○一釋品來意者明前品既是阿僧祇此即合便有壽量

○二釋說教之主者說此品教主以心王菩薩說者明佛壽量以心王為體以心王表命

自在故即明如來心王之命隨根延促長短任物自在而實如來無壽命者無長短者故

○三隨文釋義者此之一品經明佛壽量長短約未悟者作節級令知如來壽量無盡以

少顯多以短顯長若不如是云何能知佛之壽量然實如來無長短命性無生滅故如來

壽命如根本智無生無滅無去無來故約以十佛之命表之無盡故

菩薩住處品第三十二

將釋此品約作三門○一釋品來意○二釋

說法之主○三隨文釋義

○一釋品來意者前有如來壽命住劫此品

佛以菩薩行持世間人間海中攝化徧故此方如是十方國土及閻浮提例然且約住處

雖有所依化行無方不至總是身舍佛刹毛容法界之眾於刹那際應十方而等周對現

色身隨根普見為明菩薩住持攝化境界此品須來

○二釋說法之主者明菩薩攝化住持之行是心王自在隨智之行故令心王菩薩說比

住處之品總明隨自心王起智多入用故明以普賢行隨行成忍已後皆名心王於世自在明

不與物違

○三隨文釋義者支提山者此云淨信為此山見者能生淨信毗舍離城此云廣博為於

中印度中最廣大故亦名廣嚴城摩度羅城者此云孔雀城亦云密蓋皆因古事立名俱珍那城亦名俱陳那俱陳者此云大盆於大盆中蓄水若池恒於盆側修仙法常為人說護淨經及養生經後學之徒皆以師法為姓今城因此為稱目真隣陀窟此云解脫是龍名也隣陀此云處以有龍在此處聞法得解脫故因此為名摩蘭陀國未翻甘菩遮國未翻震旦或曰支那亦云真丹此翻為思慮為此國人多思慮計度以之為名是此漢國也那羅延此云堅牢疏勒國正云佉路數怛勒此方存畧但云疏勒迦葉彌羅國舊云罽賓國此翻為阿誰入昔此國未立之時其有大龍池人莫敢近其後有一羅漢見其形勝宜人居止乃從龍乞容一膝地龍乃許之羅漢

化身令大其膝漸滿池中龍以言信捨之而去羅漢以神力乾竭其水令百姓居之建立屋宅眾人咸言我等不因聖師阿誰得入此處故從此語以立其名其國即在北印度境乾陀羅國此云持地以此國多有賢聖居在此國不為他國所侵害故又云乾陀是香羅謂陀羅此云徧也言此國內多生香氣徧故在中印度北北印度南二界中間苦婆羅窟是香華樹名其窟側近多生此樹因名耳此之一品大意明菩薩攝生住持不斷三寶之行但舉此一閻多浮提表十方刹土及一切閻十浮提總皆准此◎已上加第三禪佛華會以為七會通下離世間普光明殿中會及法界品逝多林會總為十會

佛不思議法品第三十三

將釋此品約立四門○一釋品名目○二釋品來意○三釋能說法主○四隨文釋義

○一釋品名目者此品依如來身口智三業得名云何名不思議想心不能及名為不思議識名言不能及故言不議以想心曰思是有所得心故言義名識是世情名言義量是妄度量心不能及情亡識滅任智用故明如來智用非識心妄情思慮所知故非情亡想寂智現乃應是修方便三昧力方現也識情昧正智現前名為不思議

○二釋品來意者明前品既說菩薩住處攝生住持之宜此品即明能化之智故名佛不思議非情識議量所為任智自性徧周不為應物故有此品來也

○三釋能說法主者說法菩薩號青蓮華藏

多八

十二

明前品菩薩得法成忍得心自在號曰心王此明根本智圓明清淨無染名青蓮華以根本智圓明能成差別智名藏故告蓮華藏菩薩者明根本智告差別智故為表相成故三乘名先得智緣真後得智緣俗此一乘得即同得不分三世有前後故故青蓮華藏菩薩告蓮華藏菩薩說此不思議如來國土身眼耳鼻等不思議智自在法故此品意明以自心王根本智說差別智教化衆生自佛事業大自在用故為此會中從阿僧祇品至出現品有八品經總談佛果位中心行法則故該前五位差別同所歸故不移十三昧之體普光明智而有此八品法門及一部經故皆約自佛智德立菩薩名而說自法令易解故

○四隨文釋義者於此一品經長科為三十

五段前三段是問并佛加持及青蓮華獲益後三十二段是答

○第一爾時已下至云何不思議有六行經明諸菩薩大衆作念有問佛十種不思議分○第二爾時世尊已下至佛法方便有四行

半經明如來以十法加持青蓮華藏菩薩分

○第三爾時青蓮華藏菩薩已下至告蓮華藏菩薩言佛子有六行經明青蓮華藏菩薩蒙佛加持以十種自在智慧欲答前菩薩衆所問十法分

○第四諸佛世尊已下至無有障礙究竟之法有五行經明青蓮華藏菩薩都舉諸佛有十種無量住且總答前大衆十種問分◎已下通十種無量住總有三十二種無量普徧周無礙總別同異成壞自在因陀羅網門答

前十問問佛不思議法故於此三十二種如因陀羅網互參普徧周法門中約數有三百二十種答前十問此三百二十種因陀羅網互參法門中以明佛不思議無盡無盡重重重重無限無限如下一一段中自具十法如經自明不煩科意

◎此品大意明從前進修至此自己三業身語智用業用廣大會佛三業廣大用故一業之上答十百千萬等無量三業用故三業用上各答三十百千萬等十種無量三業之上各答三十百千萬等不可說無量業用餘兩段各具十百千萬無量以明三業所明業用不離二諦真俗二門一一十法之中身語智為體餘七是三業上用故以青蓮華藏菩薩答前十問有三十二種答一一答中皆有十

無盡法故意明至此佛果三業用中真俗法
滿足故故號佛為無上兩足尊也此明三種
業用二智徧周總攝諸法故青蓮華是真智
蓮華藏是隨俗智以真俗二智自說自己三
種業用廣大自在不思議門人王都邑者王
所居城所管天下為都自餘為邑宮殿者所
居止寢宿之室為宮以法治生陳設正法處
為殿毗舍闍者是鬼趣此云噉人精氣屬東
方提頭賴吒天王所管提頭賴吒者此云持
國謂護持國土因以為名乾闥婆此曰尋香
是樂神亦此王所管如於身毛孔及一微塵
中所現一切世界國土一切諸佛及以衆生
咸住其中施化佛事者妄情滅惟智境乃爾
以三昧力方現非情識所求法常如是然唯
妄情自隔故如世界種等前華藏品已釋自

餘如文自具

如來十身相海品第三十四

將釋此品約分三門○一釋品來意○二釋
能說法主○三隨文釋義

○一釋品來意者明前品說自佛三業二智
入不思議際徧周廣大無限饒益衆生此品
約三業二智入不思議智中之報身故此品
來也

○二釋能說法主者明此相海由行報成普
賢是行還令行者自說自行報德之果

○三隨文釋義者於此一品經長分為九十
九段△第一爾時普賢菩薩已下至所有相
海一行半經是初總舉如來身相如海廣多
△第二畧說九十七種大人之相分為九十
七段如下◎最下一段總說十華藏世界微

塵數諸相為總結通初爾時已下都有九十
九段經文以取十華藏世界微塵數相海莊
嚴號十身相海品此一品經文大意明三種
業用身語智廣大無限利益一切眾生善根
行上報生福相如初舉頂上三十二寶莊嚴
大人相其中有大人相名光照一切方普放
無量大光明網一切妙寶以為莊嚴者初明
三十種寶是明三種業用是萬德之總相二
種寶是二智明如來三業二智是修眾福之
本故萬善根海無不以此三業二智以為體
故故初所感果以先標為首又用嚴如來之
頭首故經云其中有大人相名光照一切方
方者法也是根本智成差別智之法故普放
無量大光明網者是差別智中隨根設教濟
澆一切眾生之所報生約因名為光網一切

妙寶以為莊嚴者一切業果福相報得皆以
此二智為所莊嚴故寶髮周徧者明以智治
生周旋普覆以此報生寶髮柔輒密緻者慈
悲柔輒眾根普濟報成故一一寶髮咸放摩
尼寶光充滿一切無邊世界悉現佛身色相
圓滿者明於根本智所生諸差別智起差別
行皆純淨無垢故報得摩尼淨光光化佛身
為約此二智純淨無礙所有報境總成智用
故皆與身同此三業上一中報十三業上三
十故二智上二種總言三十二種寶用嚴頂
髮通此頂上及身畧舉有九十七種大人之
相者明且約隨真俗二智淨三業上行七菩
提分十波羅密能淨一切三界九品煩惱便
為智用以智淨故所有報果亦淨以智無礙
自在故所有報果亦自在故九品煩惱者欲

界一色界四禪無色界四禪上二界有八欲界一共爲九品有能覺之者便以二智七覺十波羅蜜方便自利及以利生具普賢行滿便報成此九十七相以十波羅蜜方便發起三界中大自在行用故於九品煩惱上各成十波羅蜜行門成九十種大人相以七菩提分上助顯方便分明故以成七種通以此七覺分十波羅蜜助道方便行助顯九品煩惱成真俗二智令大悲圓滿於一品煩惱上成十種行門報生十種相九十配十波羅蜜七種配七覺分十華藏世界微塵相者配真俗二智三業及行普賢行徧周也問曰此出何教所配答曰此經所有法門但出自教餘經不能與此教門相會何者是自教答曰爲普賢是佛自行還令自行說自行所報得之相

普賢行者不離真俗二智七菩提分十波羅蜜故但約名知教約教知行約行治惑惑亡報成即知因果所生即爲教也不可引餘權教三乘行門例此所修因果報得但准已前諸品所放光及菩薩名乃至座名數以次類之可曉其意也佛行普賢行者不離三界九地煩惱中而成智慧之門所有報生因果還約三界九品煩惱中成殊勝智行出三界自在行獲過三界殊勝報業故以此准知可明佛意即是經之教也已下諸相以此三業二智七覺分十波羅蜜爲體又以七菩提分九波羅蜜共成一箇智波羅蜜以智波羅蜜爲佛果七菩提分九波羅蜜是行故報得九十七種大人之相十蓮華藏世界微塵數大人之相者是差別智大悲圓滿十方世界以普

賢行報得故此前後二釋義通其一故已下
 諸相約根本智起大悲用隨差別智報生如
 文自明如經云紺蒲成就者意明頸文三約
 嬰節成就云西國有紺蒲果赤色三約文成
 以此比之彌盧藏雲者明如來右輔上牙大
 人相寶酸高遠如須彌山之狀也

如來隨好光明功德品第三十五

將釋此品約立四門○一釋品名目○二釋
 品來意○三釋說法之主○四隨文釋義
 ○一釋品名目何故名為隨好光明功德者
 明前品已明十身相海有十蓮華藏世界微
 塵數相海莊嚴其身此品約其佛身相中隨
 相無性功德故以約行報得成大人之相隨
 行法身之理智以成光明故以立品名故以
 隨行破煩惱之妙理智慧以成報相之光

○二釋品來意者明前品大人之相約如來
 行生報得故即令普賢說故為普賢行是一
 切諸佛行故此隨好光明法身根本智無
 性隨行無體無相功德以為光明能大利物
 還以無形質無體性光照有緣如無形質天
 鼓音聲說法令解脫故此品須來然雖理行
 無二同為一體今約感果利物之殊不可無
 其次第

○三釋說教之主者明如是妙理之果寶手
 是引接義故表以法身妙慧性光引接一切
 衆生故立此品何故如來自說如來自說此
 品者明佛果中二愚一數法廣大愚二隨好
 光明功德愚此二位法非諸菩薩智所及至
 佛果滿方明以理智法身但與行作無依之
 體達妄之緣其行中所感功德之相即屬普

賢行成即普賢自行報生還令普賢自說自行報終之果阿僧祇品是數法廣大隨好光明功德品是法身智身自體無性無依功德故此二法皆非依行作得不由普賢行之所及故但與行為依止故是當普賢行滿佛果

位終之法是故如來自說明當位自說自位法門令後學者不惑故此品明法身智身無相理中功德所有利物之法還以光明天鼓無形質物響音所告還說法身無相妙理頓登十地離垢之功故非餘下位和會大願智悲萬行之相得故以是如來自位自說故雖行果與智果不殊然約法辯位令法則分明令發心修行者解行不惑意明法身及根本智不屬行所修生唯大悲及差別智須依此根本智加普賢大願力和融迴向修學常以

根本智為無作之體此之法身及根本智雖加十波羅蜜三十七菩提分法四攝四無量成就饒益衆生之行然根本智法身為無自性可有成壞但能與一切諸行願作無染著無煩惱無三界業解脫果之體以此品中明此隨好功德能隨行用不失自果廣利衆生此是一切菩薩行之恒佛果故故以此如來自說若無此智德之果一切衆生皆無常故如虛空體全與諸有而作全體然虛空不屬修生

○四隨文釋義者於此段中長科分為十三段

△第一爾時世尊已下至而為眷屬有三行經明舉光之體用分

△第二佛子已下至於彼命終來生此天有

八行經明如來處兜率天時放法身妙理智
無作淨光地獄獲益天鼓告因分

△第三佛子菩薩足下千輻輪中已下至入
無依智印三昧有四十二行半經明惡道衆
生蒙光所照捨報生天天鼓說法分

△第四時諸天子聞是音已已下至而不得
見有四行半經明諸天子興供而往天宮而
不得見毗盧遮那菩薩分

△第五時有天子已下至摩耶夫人胎有兩
行經明天子告諸天衆菩薩所生人間分

△第六時諸天子以天眼觀已下至悔除所
有諸障過惡有五行半經明諸天子欲往
人間供養天鼓音告云毗盧遮那菩薩體無
來去并勸發菩提心悔除過惡分

△第七爾時天鼓已下至一切罪惡悉得清

淨有二十七行經明天鼓爲諸天子說菩薩
悔除罪惡達業無生分

△第八說此法時已下至離垢三昧少分之
力有十一行半經明諸天子天女獲益分

△第九爾時彼諸天子已下至恒河沙善根
有十二行經明諸天子興香華供佛及有衆
生聞香八萬四千煩惱皆悉清淨成就香幢
雲自在光明清淨善根若有衆生見其蓋者
種金網轉輪王一恒河沙善根分

△第十佛子菩薩住此轉輪王位已下至教
化衆生有一行半經明金網轉輪王境位攝
化廣狹分

△第十一佛子譬如明鏡世界已下至必得
往生彼佛國土有四行經明舉月智如來喻
聞名獲益分

△第十二菩薩安住已下至成就如是清淨
肉眼有九行經明若有遇此金網轉輪聖王
光明即獲得十地法門分

△第十三佛子假使有人已下至末有二十
一行經明此清淨金網轉輪王肉眼所見境

界廣大難量分多八隨文釋義者於此品中十三

段文約立三門△一說光明所因從何所來

△二蒙光觸者以何因緣△三明天鼓從何
所因而能說法

△第一說光明所因從何所來者從如來自

體性自清淨法身根本無依住智自性清淨

功德所生能成相好無所依止故名隨好光

明功德品此之光明一切衆生同共有之爲

不以普賢行願助揚顯發不能顯現普賢願

行不以此光明體亦不能得成法界無限大

用是故此經名爲覺行互嚴經至此二行圓
滿遂乃各各自顯其功前品大人之相因普
賢行成還令普賢說故此品隨好光明是佛
自果無作法身無依住根本智光是佛自說
但依教主以取經意舉光之中其隨好光無

量今依此品畧舉其三△一初舉如來應正

等覺有隨好名圓滿王者都陳根本智無依

無性而能普照自在名圓滿王別舉此光中

隨用云此隨好中出大光明名爲熾盛此明

隨用能破迷惑七百萬阿僧祇光明而爲眷

屬者此明隨用脩根七百者都數約七菩提

分息六道苦乃爲七百百者數之長也皆令

發起一乘中十地道故爲此光體是佛果光

光所及者皆依本故又約八地已前有行有

開發爲七百萬者萬行阿僧祇者明光體脩

根徧周次舉兜率天爲菩薩時放大光明名幢王照十佛刹塵世界地獄衆生得衆苦休息得十種眼耳鼻舌身意清淨捨地獄身生兜率天聞天鼓音而爲說法得離垢三昧登十地道此明光照往因十信解心修力不固有因放逸生惡道者遇光苦息三業復本此明三生成果第一生修十信解心心不精專作諸惡業第二生惡道住地獄中三蒙光照觸苦息生兜率天天鼓響音告法成十地果此爲三生若也於此教中依智發心專求不懈無放逸心修方便定入佛智慧生如來家爲佛真子便名成佛如輪王第一夫人所生太子具輪王相雖未當位是王真種體無差別如是十住初發心菩薩創從信種修方便定自顯正智生如來家雖未有神足通力當

其佛位然其真智慧種與佛不殊從此一生加行修治隨其正智入變易生神通自在如人一生身語意業修有爲十善尚得生天報得天神通何況正智慧現前法身體會無心作惡專學慈悲豈可不入變易生身也若也直約第一義論通於生死總爲變化悟智即佛不約神通爲神通是利衆生之權方便故若直取覺義智是正覺自餘神通降生成佛總屬行收今至此品明覺行圓滿佛前之二種光明一名圓滿王一名光幢王者且約佛果法身根本智圓明破惑之大用一切修道不會此根本智光無成佛期△二舉足下千輻輪光名圓滿王者明成菩薩升進加行之光爲足表所行行故常放四十種光明者成十信十住十行十迴向地前四位也中有一

光隨於一切六道種種諸欲所樂皆令成熟
乃至阿鼻地獄受無間苦遇斯光者皆生兜
率天天鼓響音說法及以悔除諸惑得離垢
三昧或得無依智印定一光是一切六道應
根起信之光餘三是十住十行十迴向加行
成十地道果滿之光爲地前三賢位是圓會
悲智願行已終十地但成此地前十迴向之
功不別有位以此但放四十光明不放五十
也無功之果是佛自位不屬行故明足下光
是表十信十住十行十迴向願行之位十地
約法而成功滿前願故△三右手掌中一隨
好光明出現無量自在神力者此表引接光
以手是引接義故此乃宜同一切世間三界
所行方便非世間天人及三乘所知故且舉
此三種光明備世諸有已徧自餘廣多不論

○第二蒙光觸者何因緣者經意明先世有
信心故如經云汝往昔親近衆善知識即明
昔曾有信心之種雖造惡業生於地獄爲有
信種光及其身苦息種存便能發意捨身生
天若無先世信種設光照身者不覺不知

○三明天鼓從何所因緣而能說法如經云
但以毗盧遮那三昧力故般若波羅蜜威德
力故出音聲大約三緣而得聞之一毗盧遮
那菩薩三昧之力二於無體性三昧中有自
在無作妙慧三衆生昔曾聞此無性法身大
智慧之種方堪得聞如是妙聲迷除得道如
離垢三昧者是無性妙理自體無中邊等虛
空性性自無垢具無限智慧知見自無我所
須以方便定發起方明如法慧菩薩入無量
方便三昧是也又如善財於妙峰山上得憶

念一切諸佛智慧光明者是也總是十住初心創始顯發故至此品中不離初處滿故還向普光明殿說十信心處說此十一品十一地及佛果之門表此意也不離一念不隔一時而成果故方便三昧者任無作性蕩然自

定不收不攝任心自安萬惑自淨道自現爾方可任用施為不失其理然以普賢願行方成悲智大用無作法界緣起之門一如其上五位進修行者是也如經云於色聲香味觸其內具有五百煩惱其外亦有五百煩惱瞋行多者二萬一千貪行多者二萬一千癡行多者二萬一千等分行者二萬一千已上都

能成十使煩惱受色聲香味觸受想行識及意三能所互叅內外各十如是內外十種煩惱一皆能起十使煩惱即內外所緣各有五百煩惱由迷心境界內外相資由內五蘊成境因外五境所起能緣由此內外能所二緣十使煩惱因之不息乃至八萬四千如是十使皆因五蘊所成一使中有百以將十使中五蘊以五蘊成十使一一蘊中一百五蘊中有五百以五蘊成五塵五塵中有五百以塵蘊為內外之上共為一千配七識中有七千分三世三七二十一當二萬一千即依貪瞋癡多者及等分各二萬一千共為八萬四千餘如文自具如十使中各有內外五蘊十使互叅即有一百於一百十使一一使皆有五蘊為五百由內心緣外境互為主伴以此內外

各有五百共成一千由末那與六識相因作業有七千煩惱法如前配三七二十一亦當二萬一千

④若約此品法門天鼓所說無生理智及說悔除過惡之法甚善甚妙修道發菩提心者

可以持誦作意多入而學之以方便定慧力勤

思觀察還同此品刹那成佛於中法門融通次第具如此品如善財童子所見善知識皆

云我已先發阿耨多羅三藐三菩提心云何教我學菩薩道者明菩提無求無修無三世

故但求其行菩提無修此隨好光明功德但

與行作光明令行無依無修作者一切發心

者先修方便三昧而以顯之從此理中方當

加行是故名以果成因門以因即果門以理

智之外無別行故即理事無礙以為進修是

故但求其菩薩道即行是菩提明隨行無得

故是以發普賢行未圓滿故求菩薩道以菩

提無三世不出一刹那萬行皆圓滿故名為

佛乘即乃直論智境不分三世延促等障凡

夫及三乘謂三無數劫及無限劫是此教中

智境不遷之門故以本如是故法如是故非

佛神通使然也三乘情見謂佛神通以迷實

法本來如是此普光明殿中十一品法是都

該一部及無盡古今總不移毫念也須當如

是信解修行名悟佛知見入佛知見故當知

十地及等妙二位總依十信十住十行十迴

向法則而成

大方廣佛華嚴經論卷第三十八

音釋

藝倪奈切音 藝能也 罰居例切音 苦詩廉切音

輓乳亮切音 輓能也 罰記國名 苦以草覆屋